



金薤琳琅卷第六

太僕少卿吳郡都穆

漢酸棗令劉熊碑

漢淳于長夏承碑

漢西嶽華山廟碑

漢玄儒先生婁壽碑

漢蕩陰令張君碑

漢酸棗令劉熊碑

君諱熊字孟闕廣陵海西人也厥祖天皇大

帝垂精接感篤生聖明闕仍其則子孫亨之



分源而流枝葉扶疏出王別胤受爵列土封
侯載德相繼丕顯闕五光武皇帝之玄孫廣
陵王之孫俞鄉侯之季子也誕生照明岐嶷
踰絕長闕四柴守約履勤體聖心叡敦五經
之瑋圖兼古業覈其妙行脩言道闕五宜京
夏莫不師印六籍五典如源如泉既練州郡
卷舒委隨忠貞闕效官闕三出省揚土流化
南城政猶北辰衆星所從三祀有成來臻我
邦循東闕之惠抑闕禮官賞進厲頑約之以
禮博之以文政教始初慎徽五典勤恤民殷

關心顧下

闕二

仁恩如冬日威猛烈炎夏貪

究革情清脩勸慕德惠潛流鬯芳旁布尤愍

縣闕濟濟之儀孜孜之踰帥厲後學致之雍

泮草上之風莫不嚮應悅誨日新砥闕二素

七業勃然而興咸居今而好古雖未盡道善

必有所由處民之秉彛寔我劉父其人魯無

君子斯焉取旃允我劉父言善誘人講禮習

聆匪徒豐學屢獲有年闕載充成神民協欣

兩不相傷故德交歸焉自古在昔先民有作

洪勳則甄盛德闕刻表諸來世垂之罔極褒

賢表善揚幽拔微式序在位量能授宜官無
曠事闕二為正以卒為更愍念烝民勞苦不

均為作正彈造設門更富者不獨逸樂貧者

闕順四時積和感暘歲為豐穰賦稅不煩寔

我劉父吏民愛若慈父畏若神明悔闕令德

清越孤竹德牟產竒誠宜褒顯照具憲則乃

相闕咨度諏詢采撫謠言刊闕詩三章其辭

曰

清和穆鑠寔惟乾闕惟嶽降靈篤生我君服

骨獻聖允鍾厥醇誕生岐嶷言協闕墳懿德

震耀孝行通神動履規繩文彰彪續成是正
服以道德民

有父子然後有君臣理財正辭束帛戔戔闕

夢刻像鶴鳴一震天臨保漢寔生闕勲明試

賦授夷夏已親嘉錫來撫潛化如神其神伊

何靈不傷人

猗歟明哲秉道之樞養闕之福惟德之偶淵

乎其長渙乎成功闕暇民豫新我闕通用行

則達以誘我邦賴茲劉父用說其闕澤零年

豐黔首歌頌

右漢酸棗令劉熊碑集古錄作俞鄉侯
季子碑且謂碑云君諱熊字孟下缺一
字復引後漢書光武子曰廣陵思王荆
荆子元壽等四人皆封鄉侯而不載其
名俞鄉侯者不知爲誰金石錄引酈道
元水經注云酸棗城內有漢縣令劉孟
陽碑則所缺一字當從水經爲陽又引
李利涉編古命氏及唐宰相世系表皆
云荆王生俞鄉元侯平平生彪襲封則
熊當爲彪之弟乃光武曾孫而曰玄孫

者碑之誤也隸釋謂歐陽公不知碑在
酸棗無以名其官遂謂之俞鄉侯季子
碑而引王建題此碑詩云不向圖經中
舊見無人知是蔡邕碑而又疑其非中
郎筆法予則以爲建生於唐其云蔡邕
碑者蓋本之圖經而非鑿空而言洪氏
不當於此而疑之也

淳于長夏承碑

君諱承字仲克東萊府君之孫太尉掾之仲
子右中部將弟也累葉牧守印紱典據十有

餘人皆德任其位名豐其爵是故寵祿傳于
歷世策薰著于王室君鍾其美受性淵懿含
和履仁治詩尚書兼覽羣藝靡不尋暢州郡
更請屈已匡君爲主簿督郵五官掾功曹上
計掾守令冀州從事所在執憲彈繩糾枉忠
潔清肅進退以禮允道篤愛先人後已克讓
有終察孝不行大傳胡公歆其德美旌招俯
就羔羊在公四府歸高除淳于長到官正席
流恩褒善糾姦示惡旬月化行風俗改易輶
軒六轡飛躍臨津不日則月皓天不弔殲此

良人年五十有六建寧三年六月癸巳淹疾
卒官嗚呼痛哉臣隸辟踊悲動左右百姓號
咷若喪考妣孩孤憤泣忉怛傷摧勒銘金石
惟以告哀其辭曰

於穆皇祖天挺應期佐時理物紹縱先軌積
行勤約燕于孫子君之羣戚並時繁祉明明
君德令問不已高山景行慕前賢列庶同如
蘭意願未止中遭冤友不終其紀夙世實祚
早喪懿寶抱器幽潛永歸蒿里痛矣如之行
路感動儻魂有靈垂後不朽

右漢淳于長夏承碑金石錄云元祐中
洛州因治河得之於土壤中刻畫完好
如新隸釋云此碑字體竒怪唐人蓋所
祖述又引梁庾元威論書載隸有十餘
種此乃其間之一體宋鄭僑書衡云漢
石經諸刻乃隸體八分夏承碑乃篆體
八分然三家皆不言爲何人書也元王
文定公憚跋此碑云蔡邕書夏承碑如
夏金鑄鼎形模怪譎雖蛇神牛鬼尾雜
百出而衣冠禮樂已胚胎乎其中所謂

氣凌百代筆陣堂堂者乎予由是始知
爲中郎之蹟碑在今廣平府學後刻尚
書蔡邕伯喈及永樂七年等字乃庸妄
人所加然心竊疑之楊文貞公集中亦
有此跋謂近歲廣平府民因治河得此
蓋廣平古洛地也所謂近歲恐即永樂
七年予向官京師時廣平通判山西宋
孟清爲予言府學復有一碑字與此類
予益疑焉江陰徐子擴好竒士也嘗得
舊刻雙鈎其字近以惠予與此絕異此

云勤紹舊刻作勒約且其間字之闕者四十有五而此獨完好則其僞不俟乎言而予昔日之疑始釋然矣

楊公跋又謂中書舍人陳登以碑爲蔡伯喈書蓋不攷王氏文集之故後公撰登墓志言永樂間以篆書名者登之外有吳中滕用亨及四明王尹實予觀三家之篆用亨第一登不能逮若尹實則惟用燥筆又在登之下登門人有程南雲者以篆書得至顯官其用筆雖熟然

殊乏古法觀此亦可以知其師矣

漢西嶽華山廟碑

周禮職方氏河南山鎮曰華謂之西嶽春秋傳曰山嶽則配天乾坤定位山澤通氣雲行雨施旣成萬物易之義也祀典曰日月星辰所昭仰也地理山川所生殖也功加於民祀以報之禮記曰天子祭天地及山川歲徧焉自三五迭興其奉山川或在天子或在諸侯是以唐虞疇咨四嶽五歲壹巡狩皆以四時之中月各省其方親至其山柴祭燔燎夏商

則未聞所損益周鑿於二代十有二歲王巡狩殷國亦有事于方嶽祀以圭璧樂奏六歌高祖初興改秦淫祀太宗承循各詔有司其山川在諸侯者以時祠之孝武皇帝脩封禪之禮思登假之道巡省五嶽禋祀豐備故立宮其下宮曰集靈宮墜曰存僊墜門曰望僊門仲宗之世重使使者持節祀焉歲一禱而三祠後不承前至于亡新寤用丘虛訖今垣趾營兆猶存建武之元事舉其中禮從其省但使二千石以歲時往祠其有風旱禱請祈

求靡不報應自是以來百有餘年有事西巡輒過享祭然其所立碑石刻紀時事文字摩滅莫能存識延熹四年七月甲子弘農太守安國亭侯汝南袁逢掌華嶽之主位應古制脩廢起頓閔其若茲深達和民事神之義精通誠至初祭之福乃案經傳所載原本所由銘勒斯石垂之于後其辭曰

巖巖西嶽峻極穹蒼奄有河朔遂荒華陽觸石興雲雨我農桑資糧品物亦相瑤光崇冠二州古曰雝梁馮于幽岐文武克昌天子展

義巡狩省方玉帛之贄禮與岱元六樂之變
舞以致康在漢中葉建設宇堂山嶽之守是
秩是望侯惟安國兼命斯章尊脩靈基肅共
壇場明德惟馨神歆其芳遏禳凶札摯斂吉
祥歲其有年民說無疆

袁府君肅恭明神易碑飾闕會遷京兆尹孫
府君到欽若嘉業遵而成之延熹八年四月
廿九日甲子就袁府君諱逢字周陽汝南汝
陽人孫府君諱瓌字山陵安平信都人時令
朱頡字宣得甘陵鄆人丞張昉字少游河南

京人左尉唐佑字君惠河南密人主者掾華
陰王萇字德長

京兆尹勅監都水掾霸陵杜遷市石遣書佐
新豐郭香察書刻者潁川邯鄲公脩蘇張工
闕君闕

右漢西嶽華山廟碑予得之御史宋君
良弼集古錄引碑文云漢武帝巡省五
嶽立宮其下宮曰集靈殿曰存仙門曰
望仙而以為集靈宮者他書皆不見惟
見此碑金石錄引漢地里志云華陰有

集靈宮水經注云敷水北經集靈宮而謂不特此碑載之及觀之董氏書跋云集靈宮漢志既書之桓譚嘗賦之張昺序曰世宗經集靈之宮而復謂三輔黃圖書其制度藝文類聚亦書其名則又金石錄之所未及者此亦可以見博古之難矣

此碑後題云新豐郭香察書楊文貞公跋謂漢魏之碑多不載書刻人氏名此獨詳焉遂因之有聞於今而文貞惟以

爲郭香書而不曰香察其意蓋疑香察不類人名故也隸釋云東漢循王莽之禁人無二名郭香察書者察蒞他人之書其說爲得此文貞之所未知然洪氏亦不言爲何人書也按徐浩古迹記以碑爲蔡中郎書浩深於字學且生唐盛時殆非鑿空而言者洪氏失之於不考耳

漢玄儒先生婁壽碑

先生諱壽字元考南陽隆人也曾祖父修春

秋以大夫侍講至五官中郎將祖父太常博士徵朱爵司馬親父安貧守賤不可營以祿先生童孩多竒岐嶷有志挽髮傳業好學不厭不修廉隅不飾小行溫然而恭慨然而義善與人交久而能敬榮且溺之耦耕甘山林之杳藹遁世無悶恬佚淨漠遲德衡門下學上達有朋自遠冕紳莘莘朝夕講習樂以忘憂郡縣禮請終不回顧高位厚祿固不動心麤絺大布之衣糲糶蔬菜之食蓬戶茅宇棖樞瓮牖樂天知命權乎其不可拔也是以守

道識真之生音高尚其事鄉邨州鄰闕親愛懷年七十有八熹平三年正月甲子不祿國人乃相與論德處謚刻石作銘其詞曰皇矣先生懷德惟明優於春秋玄嘿有成知賤爲貴與世無爭滌褻衡門禮義滋醇窮下不苟知我者天身歿聲鬯千載作珍縣之日月與金石存

右漢玄儒先生婁壽碑集古錄云在光化軍乾德縣予自夷陵貶所再遷乾德令壽有墓在谷城界中而碑在墓側遂

遷碑還縣立於勅書樓下則碑在當時
得免於毀棄者歐陽公之力也隸釋云
玄儒先生蓋國人私謚猶陳寔之文範
法真之元德而其末流之弊更相標榜
三君八顧之目紛然而竒禍作矣予謂
漢人之好標榜其罹禍固宜然自漢至
今千有餘年而私謚不廢亦未聞有罹
禍者此又不可以執一論也光化軍即
今襄陽府之光化縣而乾德亦其地云
漢蕩陰令張君碑

君諱遷字公方陳留已吾人也君之先出自
有周周宣王中興有張仲以孝友爲行披覽
詩雅煥知其祖高帝龍興有張良善用蕭何
在帷幕之內決勝負千里之外析珪於留文
景之間有張釋之建忠弼之謨帝遊上林問
禽狩所有苑令不對更問嗇夫嗇夫事對於
是進嗇夫爲令令退爲嗇夫釋之議爲不可
苑令有公卿之才嗇夫喋喋小吏非社稷之
重上從言孝武時有張騫廣通風俗開闕畿
寓南苞八蠻西羈六戎北震五狄東勒九夷

荒遠既殞各貢所有張是輔漢世載其德爰
既且於君蓋其纏纏續戎鴻緒牧守相係不
殞高問孝弟於家中審於朝治京氏易聰麗
權略藝於從畋少爲郡吏隱練職位常在股
肱數爲從事聲無細聞徵拜闕中除穀城長
螫月之務不閑四門鵬正之際休囚歸賀八
月其民不煩於鄉隨就虛落存恤高年路無
拾遺黎種宿野黃巾初起燒平闕市斯縣獨
全子賤孔茂闕道區別尚書五教君崇其寬
詩云愷悌君隆其恩東里潤色君垂其仁邵

伯分陝君懿于棠晉陽珮璣西門帶弦君之
體素能雙其勛流化闕基遷蕩陰令吏民頡
頽隨送如雲周公東征西人怨思奚斯讚魯
孝父頌段前詰遺芳有功不書後無述焉於
是刊石整表銘勒萬載三代以來雖遠猶近
詩云舊國其命惟新
於穆我君既敦既純雪白之性孝友之仁紀
行來本蘭生有芬克岐有兆綏御有勛利器
不覲魚不出淵國之良幹垂愛在民幣沛棠
樹温温恭人乾道不繆唯淑是親既多受祉

永享南山千祿無疆子子孫孫

惟中平三年歲在攝提二月震節紀日上旬
陽氣厥柝感思舊君故吏韋萌等僉然同聲
賃師孫興刊石立表以示後昆共享天祚億
載萬年

右漢蕩陰令張君碑碑云君陳留已吾
人治京氏易少為縣吏徵拜郎中除穀
城長遷蕩陰令後云中平三年二月故
吏韋萌等刊石立表蓋其去思碑也字
特完好可讀漢碑中之不易得者攷之

東漢地里志蕩陰屬河內郡即今彰德
府之湯陰縣已吾屬陳留郡即今開封
府之夏邑縣

此碑予官京師時嘗於景太史伯時處
見舊搨本不及錄近得之友人文徵仲
按隸釋云東漢及魏其碑到今不毀者
十才一二凡歐趙錄中所無者世不復
有予生去宋數百年而此本兩見歐趙
錄中蓋未嘗載隸釋并隸續亦無其文
通志金石略所載碑目雖多然亦未之

及乃知昔人之言未必可信而舊物之
在天壤間者固不可盡謂之無也

金薤琳琅卷第六

金薤琳琅卷第七

太僕少卿吳郡都

穆

漢堂邑令費鳳碑

漢堂邑令費鳳別碑

漢溧陽長潘乾校官碑

漢郎中鄭固碑

漢廬江太守范式碑

漢堂邑令費鳳碑

惟熹平六年歲格于大荒無射之月堂邑令
費君寢疾卒嗚呼哀哉於是夫人元弟故

三關

字守卜胤追而誅之其辭曰

君體履柔和溫其如玉脩孝友乎閨闕執忠

蹇於王室立迹州郡仕更右職舉直措枉強

禦闕貨貢孝三署勛譽有則出宰近甸民懷

厥德色斯輕翔翻然高潔王人述職分闕班

爵台闕二招助鼎調物退已進弟不營榮祿

栖遲歷稔項領滯畜鄣土不庭黔民作闕一

命君闕二政化闕行逆善遷惡三暮致道有

耻且格文守旌功轉在堂邑垂拱不言而民

帥伏三時之間卒以闕洽旻天不弔命也早

歿春秋六十六黎儀瘁陽泣涕連灑豈愛哉

躬命不可贖臨終迷闕三內發祖業良田畝

直一金推予弟息辭位讓財行義高邵卓不

可及名實相副有始有卒闕二人善瘼方切

惻

故吏故鄣施業字世堅義民堂邑戚忠忠年

十有一慈考早隕喪以備於禮制蓬首而闕

字壤而消辟地闕三行母氏以闕四而悼傷

服闕菲五五縗杖莫未除廣陵之郡守東海

字闕二聞寢疾而終卒凡百普悲闕四舜化比

屋之餘慶隨闕棺柩車哀以而逆之祖載已
畢託還返其故鄉君闕其節操悲其有闕二
每以闕五其老親忠闕二君厚德念君之仁
恩聞君之隕隧剝斷而辛酸復截縗麻杖闕
君之柩棺扶號而竭闕泣涕其闕八甫於岐
山闕其從之迷君而到官上書而薦君盡
禽息之闕三君之闕三君闕三闕七於山闕
列種嘉竒樹持爲之潤解忠業與闕二猶君
恩使然雖君有大化孰能爾者難子喪之終
字闕三思其顏而闕死可贖不愛闕二人今君

闕於彼卓譎而超倫吏民慕高蹤來者其如

雨偉名建闕一石垂示於闕二

門下功曹徐侃字元節主簿呂嘉字元闕主

史陳信字聖舉主記史闕忠字建臺門下游

徽闕二字叔騰門下賊曹闕二字聖臺門下

史曹助字仲臺闕吏日常字孝讓從掾位徐

超字元貴

右漢堂邑令費君碑乃君夫人之弟卜

胤所撰蓋誅辭也辭之後載鄣土故吏

施業堂邑義民戚忠皆竭力送終而忠

金鑑卷七
三
之所行尤爲卓絕攷之費君沒時忠有
廣陵之役旣聞訃來奔祖載還鄉及葬
有期復截衰麻扶號柩前列植丘木誠
可謂之義矣漢去古未遠故民俗之厚
如此若後世其可得哉

漢堂邑令費鳳別碑

君舅家仲孫甘陵石勛字子才載馳載驅來
奔于喪庭肝催意悲感切傷心瞻彼碑誅懷
之好音司馬慕蘭相南容復白珪仰之以彌
高鑽之而彌堅不堪哀且思叙詩之一篇庶

幾昔子夏起夫子之所言其辭曰

君諱鳳字伯蕭梁相之元子九江太守之長
兄也世德襲爵銀艾柏亞遐祖之鴻軌拓
前代之休蹤邈逸越而難繼非群愚之所頌
仁義本於心慈孝著於性言不失典循行不
越矩度清潔皦爾塗而不澤恤憂矜厄施而
不記由近及遠靡不覆載故能闡令名而雲
騰揚盛聲而風布踐郡右職三貢獻計辟州
式部忠以衛上漢安二年吳郡太守東海郭
君以君有透地之節自公之操年卅一舉孝

廉拜郎中除陳國新平長神化風靡惠以流
下靜而為治匪煩匪擾乾乾日禋 此黔

首功成事就色斯高舉宰司委職位思賢以
自輔玄懿守謙虛白駒以闕一隄丹陽有越

寇没闕四命君討理之試守故鄣長蓋危亂
有不讓又畏此之闕二而闕牧爰止其師旅

鷗若飛鷹鷄闕一若夫虢虎彊者綏以德弱
者以仁撫簡在上帝心功訓而特紀輶輿宰

堂邑暮月而致道祝闕四遂據于卿尹中表
之恩情兄弟與甥舅焉與女蘿性樂松之茂

好聞君顯令名舉宗為歡喜不悟奄忽終藏

形而匿景耕夫釋耒耜桑婦投鉤莒道阻而
且長望遠淚如雨策馬循大路褰裳而涉渭

闕二歌闕一離思黃鳥集于楚惴惴之臨穴
送君於厚土嗟嗟悲且傷每食闕不絕夫人

篤舊好不以存亡改文平感渭陽悽愴益以
甚諸姑咸壁踊爰及君伯姊孝孫字元宰生

不識考妣追惟厥祖恩蓬首斬縗杖世所不
為流稱於鄉黨見吾若君存剝裂而不可已

一別會無期相去三千里絕翰永忼慨泣下

不可止

右漢堂邑令費鳳別碑歐陽公直以為
費鳳碑趙明誠則以為費鳳碑陰隸釋
謂費氏父子三碑並列於吳興校官蓋
鳳之父汎為梁相有碑而鳳亦自有碑
此則鳳中表石勛字子才之所述也集
古後錄謂勛不遠三千里而會中表之
喪觀此情友親厚之心可以悠然而生
則隸釋所稱別碑為是三碑今皆不存
此予得之四明豐解元坊宋搨本也

漢溧陽長潘乾校官碑

蓋漢三百八十有七載闕三于闕四銘工著
斯金石界誅曰

溧陽長潘君諱乾字元卓陳國長平人蓋楚
大傅潘崇之末緒也君稟資南闕之闕四德

之絕操髻髦闕敏闕學典謨祖講詩易剖演
奧藝外覽百家衆闕契聖抱不測之謀秉高

世之介屈私趨公即仕佐上郡位既重孔武
赴箸疾惡義形從風征暴執訊獲首除曲阿
尉擒姦剗猾寇息善歡履孤竹之廉蹈公儀

之潔察廉除茲初厲清肅賦仁義之風彌三
之跡垂化放乎岐周流愛雙乎彌二親賢實
智進直退慝布政優優令儀令色獄無吁嗟
之寃野無叩囚之結矜孤頤老表孝貞節重
義輕利制戶六百省無正繇不責自畢百姓
心歡官不失實於是遠人聆聲景附樂受一
廛既來安之彌一役三年惟泮宮之教反彌一俗
之禮構脩學宮宗懿招德既安以寧于候用
張籩豆用陳發彼有的雅容彌一閑鍾磬縣矣
于胥樂焉乃作叙曰

翼翼聖慈惠我黎蒸貽我潘君平茲溧陽彬
文赴武扶弱抑彊彌一刈彘雄流惡顯忠咨疑
元老師賢作朋脩學童冠琢質繡章寔天生
德有漢將興尚旦在昔我君存今彌一此龜艾
遂尹三梁永世支百民人所彰子子孫孫畀
爾熾昌

丞沛國銍趙勳字萁伯左尉河內汲董並字
公房右尉豫章南昌程陽字孝遂時將作吏
名戶曹掾楊淮議曹掾李就議曹掾桓檜戶
曹史賀彌一從掾位侯祖主記史吳超門下史

吳訓門下史吳翔門下史時球

光和四年十月己丑朔廿一日己酉造

漢校官碑宋紹興十一年溧水尉喻仲
遠得於固城湖濱置之官舍今在孔廟
之大門右長樂陳長方雖嘗碑其所得
本末釋文則未之見碑以靈帝光和四
年歲在辛酉造距今凡一千一百五十
三年番陽洪景伯先生出字爲之釋謂
挈爲契菴爲黎畀爲俾榭爲野賚爲責
剗去其刀賢去其貝干侯與紆侯通尚

且謂太公周公可謂精審有據其餘不
可辨者尚有二十七字今觀首行自三
百字以下上斯字凡十有六字比之洪
氏作釋文時又皆不可攷且如第三行
之字之下是禱字禱下闕一字有天字
敏之上是克字衆之下是儁字退之下
是慝字役之上爲復反之下爲失此之
上爲即皆隱隱可見洪則悉以爲闕又
如旣安且寧則以爲呂寧梅檜則以爲
桓檜豈當時誤於墨本而然耶溧陽志

至謂元卓爲元貞是又以名乾而傳會也禧承乏於茲暇日與士友曹國傑摩莎久之得其二三因以洪先生釋文列於上僭附所見於其下勒諸樂石以補前脩之所未及者餘尚俟博雅君子云至順四年龍在癸酉夏五月文學掾濟陰單禧謹識

右漢溧陽長潘乾校官碑在今南畿溧水縣學蓋溧水即漢溧陽地也予初得此碑而不知其有釋文近始得之乃元

至順四年校官單禧所爲而刻之者也禧謂此碑宋紹興中縣尉喻仲達得於固城湖濱置之官舍則其得免於毀棄仲遠之力也禧又有跋謂考訂碑文與隸釋不同者二十七字而復辨溧陽志之失可謂有功於文字者故備錄之

漢郎中鄭固碑

君諱固字伯堅著君元子也含中和之淑質履上仁彌三孝友著乎閨門至行立乎鄉黨初受業於歐陽遂窮究于典籍膺游夏之文

學襄冉季之政事弱冠仕郡吏諸曹掾史主
薄督郵五官掾功曹入則腹心出則爪可忠
以衛上清以自脩犯顏謇諤造膝詭辭加以
好成方類推賢達善遂遁退讓當世以此服
之邦后珍瑋以爲儲舉先屈計掾奉我闕貢
清眇冠乎群彥德能簡乎聖心延熹元年二
月十九日詔拜郎中非其好也以疾固辭未
滿期限從其本規乃遘凶愍年四十二其四
月廿四日遭命隕身痛如之何先是君大男
孟子有楊烏之才善性形於岐嶷闕二見於

垂髫年七歲而夭大君夫人所共哀也故建
闕共墳配食斯壇以慰考妣之心琦瑤延以
爲至德不紀則鍾鼎奚銘昔姬闕二武弟述
其兄綜闕四行於茂陋獨曷敢怠乃刊石以
旌遺芳其辭曰

於惟郎中寔天生德順親誨弟虔恭竭力教
我義方導我禮則傳宣孔業作世模式從政
事上忠以自勗貢計王庭華夏歸服帝用嘉
之顯拜殊特將從睢意色斯自得乃遭氛災
隕命顛沛家失所怙國闕忠直俯哭誰訴仰

號焉告嗟嗟孟子苗而弗毓奉我元兄脩孝
罔極魂而有靈亦歆斯勒

右漢郎中鄭固碑歐陽公謂碑文磨滅
官闕卒葬年月皆莫可考予家本磨滅
尤甚蓋以去歐公之遠也而隸釋所載
文字獨完其云君著君之子延熹元年
四月廿四日遭命隕身年四十二則門
闕與卒固可考也歐公所錄在隸釋之
前而乃云云若此不可曉也

漢廬江太守范府君碑

君諱式字

闕八

功存有夏寔曰御龍

闕昨商

周世昭其隆晉主夏盟有士會者光演弘謨

翼崇霸業錫邑命族闕爲范氏則其後也君

稟靈醇之茂度體玄亮之殊高徽柔懿恭明

允篤恕九德靡爽百行淵備弘道耽藝恢韜

墳籍探賸研機罔深不入若乃立德隆禮樹

節寶真志諒足以弼國篤友足以輔仁用能

昭其洪懿聲充宇甸接華彥於汝墳潤枯斃

於荆漢超管鮑之遐蹤信靈諱乎炳煥是以

闕化泉流芳闕鴻舊燿仁闡於權輿濟俗侔

乎皇訓群公偉焉弓旌盈路再讓考闕二三
府舉高第侍御史拜冀州刺史糾剔瑕隱六
教允施翰飛肅於鷹揚典刑闕二軌闕帝闕
其勲遷廬江太守擬泰和以陶化昭八則以
隆治彌闕弘略惠訓亡倦闕二協闕三齊闕二
字清源之深閱寶疏氏之至順以疾告辭齧
光燁燿詠琴詩以寧闕九其猶充洽外內寔
紹德之奧藪而儀民之淵表也未亮三事闕三
字終闕六常山相暨子汜孫而胤嗣罔繼粵
青龍三年正月丙戌縣長汝南薛闕七感靈

墀之不饗思隆懿模以紹奕世乃與縣之碩
儒咨典謨之中闕同宗闕三之胄昭告祖考
俾守厥祀本著宣融之祚人神協休茂之
慶焉禮也於是鄉闕二上計掾翟循州部泰
山從事史翟邵等僉以爲君雖輝名載籍光
颺前列而靈墳亡闕儀問靡述遂相與略依
舊傳昭撰景行刊銘樹墓以聲百世其辭曰
於昭上德實唐之胤誕表靈和蹈規履信窮
神周覽柢道之訓邁德徽猶鴻漸闕舊機彼
夸毗寶此醇懿以文會友以仁翼闕敷化濟

殖群生以遂永言孝思民之攸暨如何昊天
不信其軌明德不報胤 亡紀爰輯訓典詢
爾髦士有茲赫闕以永遐祉詒厥孫謀燿于
萬祀

右漢廬江太守范式碑式仕漢為侍御
史拜荊州刺史遷守廬江官亦不卑而
史氏列之獨行傳中蓋以式之可重者
在厚於友誼其官爵固可略也此碑但
云篤友足以輔仁及云超管鮑之遐踪
其外更無他語洪丞相謂未足以光颺

盛德是已唐李嗣真書後品以碑為蔡
伯喈書考之碑立於魏明帝青龍三年
則非伯喈之筆明矣後鄭氏金石略亦
云是蔡公書則又承書品之誤也

金薤琳琅卷第七

金薤琳琅卷第八

太僕少卿吳郡都穆

隋皇甫府君碑

隋龍藏寺碑

隋姚恭公墓誌銘

隋緣果道場塼塔記

隋柱國左光祿大夫弘義明公皇甫府君碑

銀青光祿大夫行太子左庶子上

柱國黎陽縣開國公于志寧製

夫素秋肅煞勁草標於疾風叔世艱虞忠臣
彰於赴難銜須授命結纓殉國英聲煥乎記
牒微烈著於旂常豈若豐起蕭墻禍生蕃翰
強踰七國勢重三監其有蹈水火而不辭臨
鋒刃而莫顧激清風於後葉抗名節於當時
者見之弘義明公矣君諱誕字玄憲安定朝
邠人也昔立効長丘樹績東郡太尉裂壤於
槐里司徒胙土於彤門是以車服旌其器能
茅社表其勲德銘功衛鼎騰美晉鍾盛族冠
於國高華宗邁於樂郤備在史牒可略言焉

曾祖重華使持節龍驤將軍梁州刺史潤木
暉山方重價於趙璧媚川照闕曜竒采於隨
珠祖和雍州贊治贈使持節散騎常侍車騎
大將軍儀同三司膠涇二州刺史高衢將騁
邁天追風之足扶搖始搏早墜垂天之羽父
璠使持節驃騎大將軍開府儀同三司隨州
刺史長樂恭侯橫劔控枏威重冠軍枌瑞蕃
條聲高勃海公量包申伯稟嵩山之秀氣材
兼蕭相降昴緯之淑精據德依仁居貞體道
含章表質詎侍變於朱藍恭孝為基寧取訓

於橋梓鋒剗犀象百練挺於昆吾翼掩鴛鴻
九萬奮於溟海搏韜 產文瞻卿雲孝窮温
清之方忠盡匡救之道同何充之器局被重
晉君類荀攸之宏畚見知魏主斯故包羅衆
藝囊括羣英者也起家除周畢王府長史滎
名蕃牧則位重首寮袷服睢陽則譽光上客
既而蒼精委馭炎運啓畚作貳邊服寔資令
望授廣州刺史悅近來遠變輕詵於雕題伐
叛懷柔漸淳化於緩耳蜀王地處維城寄深
磐石建璽玉壘作鎮銅梁妙擇竒材以爲僚

佐授公益州總管府司法昔梁孝開國首辟
鄒陽燕昭建邦肇徵郭隗故得馳令問於碣
館播芳猷於平臺以古方今彼此一也尋除
尚書比部侍郎轉刑部侍郎趨步紫庭光映
朝列折旋丹地譽重周行俄遷治書侍御史
彈違紕慝時絕權豪霜簡直繩俗寢貪競隨
文帝求衣待旦志在恤刑呪網泣辜情存緩
獄授大理少卿公巨細必察同張季之聽理
寬猛相濟比于公之無冤但禮闈務殷樞轄
寄重允膺此職寔難其人授尚書右丞洞明

政術深曉治方臧否自分條目咸理丁母憂
去職哀慟里閭隣人為之罷社悲感衢路行
客以之輟歌孝德則師範彝倫精誠則貫徹
幽顯雖高曾之至性何以加焉尋詔奪情復
其舊任于時山東之地俗阜民澆雖預編民
未行聲教詔公持節為河北河南道安撫大
使仍賜米五百石絹五百匹公輜軒布政美
冠皇華之篇擁節觀風榮甚繡衣之使事訖
反命授尚書左丞然并州地處參墟城臨晉
水作固同於西蜀設險類於東秦寔山河之

要衝信蕃服之襟帶授公并州總管府司馬
加儀同三司公贊務大邦聲名籍甚精民感
化黠吏畏威屬文帝劔爾空留鑿蹕莫反楊
諒率太元之甲擁河朔之兵方叔段之作亂
京城同州吁之挺禍濮上雖無當璧之兆乃
懷奪宗之心公備說安危具陳逆順翻納魏
勃之榮反被王悍之災仁壽四年九月溘從
運往春秋五十有一萬機起殲良之歎百辟
興喪予之悲切孔氏之山頽痛楊君之棟折
贈柱國左光祿大夫封弘義郡公食邑五千

戶謚曰明公禮也喪事所須隨由資給賜帛
五千段粟三千石惟公溫潤成性夙表白虹
之珍黼黻為文秀缺五行已窮於六本蘊德
包於四科延閣曲臺之奇書鴻都石渠之祕
說莫不尋其枝葉踐其隩隅譬越箭達犀飾
之以括羽楚金切玉加之以磨缺一救之同
於指困親識待其舉火進賢方於推轂知己
俟以彈冠存信捨原黃金賤於然諾忘身殉
難性命輕於鴻毛齊大小於冲襟混寵辱於
靈府可謂缺四冠冕時雄者也方當亮采泰

階參綜機

缺一

豈謂世逢多故運屬道消未

展經邦之謀奄鍾非命之酷世子民部尚書

上柱國滑國公無逸以為邢

缺一

之下缺三

仲之

缺三

之東誰知子孟之墓乃雕戈勒石

騰質飛聲樹之康衢永表芳烈庶葛亮之龐

鍾生禁之以樵蘇賈逵之碑魏君歎之以不

朽乃作銘曰

缺二膺期穆帝連榮經綸執鈞匡濟門承積

慶世挺偉人夜光愧寶朝采慙珍雲中北陸

日下方荀抑揚元

缺一

名馳碣石聲高建

禮珥筆憲臺握蘭文陛分星裂土建侯開國
輔籍正人相資懿德中臺輟務晉陽缺十字相
成師構難太叔興戎建德効節夷吾盡忠命
屯道著身歿名隆牛亭始卜馬鬣初封翠碑
刻鳳丹旆圖龍煙缺

銀青光祿大夫歐陽詢書

右隋柱國左光祿大夫皇甫誕碑于志
寧撰歐陽詢正書金石錄謂嘗得誕墓
志又得此碑與北史及隋書參攷以正
史氏之謬又謂碑與墓志所述亦有不

同墓志今不得見碑在陝西西安府學
不甚缺壞蓋歐書中之得意者也

隋龍藏寺碑

竊以空王之道離諸名相大人之法非有去
來斯故將喻師子明自在如無畏取譬金剛
信畢竟而不毀是知涅槃路遠解脫源深隔
愛慾之長河間生死之大海無船求渡既似
龜毛無翅願飛還同兔角故以五通八解名
教攸生二帝三乘法門斯起檢龕攝細良資
汲引之風挽滿陷深雅得脩行之致若論乾

闡之城皆安芭蕉之樹盡空應化詎真權假
寧實釋迦文字缺一說字缺一之字缺一須菩提豈
證果之人然則習因之指安歸求道之趣奚
向如幻如夢誰其受苦如影如嚮誰其得福
是故維摩詰具諸佛智燈字缺一之坐斯來舍
利弗盡其神通天女之花不去故知業行有
優劣福報有輕重若至凡夫之與聖人天堂
之與地獄詳其是非得失安可同日而論哉
往者四魔毀聖六師謗法拔髮翹足變吞
麻李固之內結其惡黨竹林之下亡其善聚

護戒比丘翻同電草持律字三等霜蓮慧殿

仙宮寂寥安在珠臺銀闕荒涼無處離離綴

彩寧勞周客含含奏曲詎假殷人我大隋乘

御金輪冕旒玉字缺一上應天命下順民心飛

行而建鴻名揖讓而升大寶匪結農軒之陣

誰徇湯武之師稱臣妾者遍於十方弗遇蚩

尤之亂執玉帛者盡於萬國無陷防風之禍

斯乃天啓至聖大造區域垂衣化俗負宸宇

民昧旦紫宮終朝青殿道高羲燧德盛虞唐

五福咸臻衆祝畢集低茆出月搖蕙含風沉

壁觀書龍負握河之紀功成治定神奉益地
之圖於是東暨西漸南阻北邁隆禮言洽至
樂云和感天地而動鬼神辨尊卑而明貴賤
而尚勞已亡倦求衣靡息豈非攸攸黔首垢
障未除擾擾蒼生蓋纏仍擁所以金編寶字
玉牒綸言滿封盈函雲飛雨散慈愛之旨形
於翰墨哀愍之情發於衿抱日月所照咸賴
陶甄陰陽所生皆蒙鞠養故能津濟率土救
護溥天協獎愚迷扶導聾瞽澍茲法雨使潤
道牙燒此戒香令薰佛慧脩第壹之果建最

勝之幢拯旣滅之文匡以墜之典忍辱之鎧

滿

缺二

都微妙之臺充於赤縣豈直道羅什

有寄弘通故亦迦葉目蓮聖僧斯在龍藏寺

者其地蓋近於燕南昔伯珪取其謠言

缺三字

水母恤往而得寶窺代常山世祖南旋至高

邑而踐祚靈王北出登望臺而臨海青山歛

霧淥水揚波路款晉而適秦途通

缺一

而指

衛

缺二

之落矩步非遥平原之樓規行詎遠

尋派避世彼亦河人幽閑博敞良為福地太

師上柱國大威公之世子使持節左武衛將

缺一上開府儀同三司恒州諸軍事恒州刺
史鄂國公金城王孝僊世業重於金張器識
逾於許郭軍府號為飛將朝廷稱為虎臣領
袖諸缺一冠冕羣俊探賸索隱應變知機著
義尚訓御之勲立勲功事勞之績廊廟推其
偉器柱石捐其大材自馳傳蒞藩建旗缺一二
招懷歎逸蠲復逃亡遠視廣聽賈琮之按冀
部賞善戮惡徐邈之處涼州異軫齊奔古今
一致下車未幾善政斯歸瞻彼伽藍非因草
創每奉勅勸獎州內士庶壹萬人等共廣福

田公爰啓至誠虔心徙石施逾奉蓋檀等布
金竭黑水之銅罄赤岍之玉結瑠璃之寶網
飭纓絡之珍臺於是靈刹霞舒寶坊雲構崢
嶸膠葛穹隆謫詭九重壹柱之殿三休七寶
之宮彫梁刻桷之竒圖雲畫藻之異白銀成
地有類悉覺之談黃金鏤楯非關句踐之獻
其內閑房靜室陰牖陽窓圓井垂蓮方踈度
日曜明璫於朱戶殖芳卉於紫墀地映金沙
似遊安養之國簷隱天樹疑入歡喜之園夜
漏將竭聽鳴鐘於寺內曉相旣分見承露於

雲表

坐來會之衆何憂字缺一然飲食持

鉢之侶奚念粵以開皇六年歲次鶉火疰嚴
相就庶使皇隋寶祚與天長而地久種覺花
臺將神護而鬼衛乃為詞曰多羅秘藏毗尼
覺道斯文不滅憑於大造誰薰種智誰壞煩
惱猗歟我皇實弘三寶慧燈翻照法炬還明
菩提果殖救護心生香樓並構貝塔俱營充
遍世界彌滿國城憬彼大林當途向術於穆
州后仁風遐拂金粟施僧珠纓奉佛結瑤草
宇構瓊架室鳳穴槩日虹梁入雲電飛窓戶

雷驚撩焚綺籠金鏤縹壁椒薰綈錦亂色丹
素成文髣髴雪宮依稀月殿明室結幌幽堂
啓扇缺一席未窺跼龍誰見帶風蕭瑟含烟
蕊藉西臨天井北拒五臺川谷苞異山林育
材蘇秦說反樂毅奔來鄒魯媿俗汝穎慙能
惟此大城壞異所踐踈鐘嚮度層盤露法八
聖四禪五通七辯戒香恒馥法輪常轉

開皇六年十二月五日題寫

齊開府長兼行參軍九門張公禮之缺

右隋龍藏寺碑齊張公禮撰而不著書

人名氏集古錄謂寺已廢碑在常山府署之門常山即今之真定予近以使事過之聞府治東二里龍興寺有古銅佛一軀崇七十二尺閣之覆者崇百有三十尺與太守同年李君往遊其間見殿前一古碑其趺已沒土中讀之乃公禮文蓋寺在隋名龍藏歐公謂寺廢與碑在常山府署蓋未嘗親歷其地故誤書耳

隋左屯衛大將軍左光祿大夫姚恭

公墓誌銘并序

缺四諱辯字思辯武威人也導清源於媯汭

肇崇構於軒丘世缺一斯缺一五世祖泓為

晉所滅子孫播越居于武威曾祖讚撫軍缺

字軍將軍武威太守並以碩量偉才佐時匡

國父寶散騎常侍缺二山川降神象緯幼而

風韻開爽志節通亮弓殫百步之奇劍缺

氣馳名遂以材官入選周保定四年起家宗

侍下士天和二年缺二虧勝羣帥見囚公頻

進奇謀竟弗能用乃以舟師先濟朝廷缺二

統營校公撫養士卒勸課農桑莫不家實食

廩人知禮節字闕三賞五年從周武帝平定晉

州推珍高壁十二月進屠并州既字缺一公獨

為後距轉戰不衰皇輿獲安公之力也頻蒙

優賞以累字缺六年從定相州以前後功授

大都督封安養縣開國子邑四缺檢校武侯

兵事又命公隨上柱國拔崇於武陟合戰

又於野馬字缺相濟寔繁有徒公建旆遄征

攝弓言邁推鋒接戰充著奇功大象字缺一戶

開皇元年授上開府儀同三司進爵為公增

邑為一千戶字缺一所屆即事戎車公誠勇奮

發義同閫外屢出奇兵頻推醜虜字缺一天府

凡厥賞賜散之士卒二年匈奴復入涼州詔

以公為行軍字缺一前後衝擊晝夜攻圍校尉

之井既枯將軍之泉又竭空有思梅之字缺一

以亡為存榮勳命賞理在不次五年授右武

候驃騎將軍霍去病字缺一茂如也六年授雲

州道水軍總管戈船掩渚巨艦浮川河湟肅

字缺一匪曰崇墉基峙聳堞相望邊柝弗驚控

弦遠逝其年授使持節河字缺一化若神明十

年檢校豐州總管河州刺史行豐州刺史事
公才略字缺三弘政教安民和衆於是乎在十
二年轉授左武侯將軍尋為涼州字缺一邊烽
寢候毛毳幕旒裘望風斂迹十六年使持節靈
州總管諸軍事字缺二俗易風移政成朞月十
八年授原州道行軍總管十九年授環州道
字缺一總管公屢總戎律特精邊事每秋風起
塞胡騎揚塵折衝之任非公字缺二年授左武
候大將軍進爵蔡陽郡開國公食邑一千五
百戶大啟字缺二皇丘欽明御籙睿聖纂圖特

荷天眷恩遇隆重密勿禁衛知無不為字缺一
威等同進位大將軍左武侯大將軍如故三
年以母憂去官其年有字缺一自天幾於毀滅
僬俛王事杖而後起四年以官方草創授金
紫光祿大夫 光祿大夫如故車駕北巡諸
蕃朝朔以舊典糾察整肅軍容乃令公字缺一
旌門洞張內外肅然事嚴細柳吐谷渾大保
五期尼樂周等率衆歸附字缺一鑿蹕西幸底
定渾國乃以公為鬱卑道將軍旗鼓所振莫
不摧殄俘字缺一右光祿大夫左屯衛大將軍

如故乃獻凱廟庭禮崇備物六軍之長車
駕南巡江都以公京師留守職居爪牙任惟
心膂出處崇重朝野榮之大業七年三月遘
疾十九日薨於京兆郡春秋六十有六惟公
體量宏達缺興義造次弗違虛已推賢始終
同致加以雄圖恢廓竒略弘遠氣有餘勇莫
之與抗善於御撫得士卒之心長於政術致
廉平之美自入統禁旅出缺二所夙夜匪懈
簡在帝心至於敬友穆親輕財貴義家稟誠
孝奉以周旋訓不與善遽此歸全知與不知

莫不流涕粵以其年十月癸丑朔二十一日
缺一有詔故左屯衛大將軍右光祿大夫姚
思辯性理和謹秉心恭慎歷任缺式表哀榮
可贈左光祿大夫又蒙賜物八百段粟麥一
千石謚曰恭公

祀缺長瀾若水遠馥薰風時賢繼及世德斯
隆勤王成務啓羈垂功炳靈不已缺冥照落
鴈窮能通援盡妙蹶張選勇期門待詔職分
七萃官聯五營缺陪衛出擁高旌汜水兵略
常山陣勢卓犖明謀沉深節制功有必取筭

無遺計缺恩寵顯赫身名執恭履順守滿持
盈方陪紀岳遽掩佳城遊魂不歸逝川缺春
秋邇代徽猷永遠

右隋左屯衛大將軍姚辯墓誌銘虞世
基撰歐陽詢正書志稱辯精於邊事屢
立大功蓋老將也其官至大將軍而死
謚恭公爵亦尊矣而隋史不為立傳向
非率更之書後世不復知有辯此古人
墟墓之文所以必托之名筆豈無意邪

隋江夏縣緣果道場塼塔下舍利記

夫至理空冲尋求之源悠緬法身寂寞無方
之應奄臻至如花疊未燃駐影留髮香薪已
燎散體分形故有寶塔珍龕崔嵬四園之上
雲興地踊照曜八國之中俾我聖迹未之湮
墜緣果道場者梁天監十二年太歲癸巳長
史劉端捨宅為寺有命過僧歸閣梨盡心建
造閣梨降自江缺一氏族未詳戒慧總持甚
有靈驗於是鴻基勝趾締構日新三業薰脩
七財具足以今大隋大業九年昭暘之歲江
夏縣緣果鄉長劉大懿等遵依勅旨共三鄉

仕民奉字缺二齊與道場七層塼塔一所安鎮

此地次有清信弟子黃慧龔慧俊慧達等兄

弟並德字缺一佳雅難兄難弟誓立五根願弘

四事於所住宅福瑞累彰亡父於大業三年

二月乃於食內感舍利一枚大小相懽觀茲

希有安止水器且浸且浮旋遠久之光明遍

室頂戴虔禮日申供養到七年正月俊女雞

娘又感二枚斯實迹現難思抑聞圖籍次有

弟子李藥王信首宿馳賢才簡足雖室無瑞

井手闕金錢每用放濟居心傾捨為業以開

皇廿年行至常州境感舍利一枚到大業五

年於所住宅又感二枚昔者阿難捧函如來

讚其希有康會瓶寫吳主嗟其神異詢諸經

誥今古同符以今季夏六月八日奉送散身

永窆基下眾緣贊助普設大齋方俟七級巍

峩接霄房而颺采九盤煜曜寶鐸韻而流聲

上資帝朝爰洎遐邇設使芬盡方城五分之

身常住石銷天袂金剛之地巖然敢忘議善

乃為銘曰

茫茫宇宙悠悠世間九地街海四字缺二山三

途有獄五道無關魂隨動泊識缺一循還至
聖何像疑爾悵怕示現無方迦維垂迹等救
燒燃通悲幽溺息衆權城椎輪火宅八十化
盡天人喪師撫膺雨淚香水缺一毗四王典
護八國均持機緣靡隔靈祥俟時坊墳式建
層表臨空非因鬼力詎假神工金盤仰露寶
鐸搖風山移川徙徽業興隆

右隋江夏縣緣果道場塼塔記無書撰
人氏名記中載舍利瑞應之事不一此
非吾之所知但隋碑之傳世者絕少以

予嗜好之薦集錄之勤三十年間所得
隋碑惟皇甫府君龍藏寺姚辯墓志及
此而已

金薤琳琅卷第八

金薤琳琅卷第九

太僕少卿吳郡都穆

唐洛陽令鄭府君碑

唐杳冥君銘

唐郎官石記序

唐故洛州洛陽縣令鄭府君碑

觀夫道周通變青史徽其德庸業濟彝倫丹
圖叙其景象所以昭晉長世歲蕤大流而樹
聲之鞅一爰存相質之端盖闕使夫觀巨仲
之行者勵思齊之高懷隨會之功者識與歸

之壘著為不朽文在茲乎公諱敞字仲高滎陽開封至澧鎬為都雍鄠獻邑作邦作對策罔謀朝之謂才乃公乃侯服冕乘軒之謂貴門高階峻慶積祚流太尉卑躬置屏風而入坐尚書納諫曳革履而昇朝思元之憂罔恤至平卿之刺邪矯枉百世之盛莫之與京高祖先護後魏雍州刺史尚書右僕射驃騎大將軍儀同三司襄城公行高言象之表道合運期之數曾祖偉後魏龍驤將軍北徐州刺史中軍將軍侍中滎陽守襄城公祖大仕隨

上開府儀同三司驃騎將軍渠州刺史襄城公並文藝武節光罔贊時方龍舟於巨川得騏驥於大路父仁基隨通事舍至研深機以開務邁弘操以範俗公降巖廟之宏器蹈珠玉之朗節化其羽翼既收四見之奇伐其條枚匪辭一覲之速貞觀七幸制策高第穩越州都督府參軍事探其洞穴史思識微禹之功步彼高衢而子得遺風之乘入除左領軍衛兵曹又遷潞州司功參軍事六軍七校戎政孔殷命三牒缺府邑之靈氣流滎波之純

液直躬岳色清嚴凜乎秋霜抱質懷文英穎
彬於夏采挹損以弘已寵辱若驚靖恭以臨
至敬慎如祭 宗望推重召為通事舍生留
疾不拜轉瀛州靖苑令公以為立長以為官
也非立官以為長也於是明察以斷忠信以
寬奸利息機則俗化醇厚浮末不鬻則至用
豐殷岳以立身清逾十仞言必顧義寶過盈
尺故至有神明之敬有父母之親欣詠終朝
石碑在頌又為岐州雍縣令政如清苑亦有
德碑又除益州新繁令加朝散大夫入為司

裡員外郎增秩小黃歸大夫之顯祿拔奇禮
學綜郎官之明祀轉駕郎部中校檢洛陽令俾
又都至掌儀輦政京太師衆禁踈網闊情有
萬源道難一貫公綜理殷劇馭煩以簡高義
侔於昇雲明道著於夏也旌發伏隱察銖兩
之奸導揚滯美盡銜筴之利化其善教戎生
楚言懷其令聲蟹匡蠶績加以勵精聽斷之
術側席俊秀之才稜威於七貴五侯滅私於
四隱六戚令至除雪既察孝廉行馬療寒即
收門士權豪由其斂手鷄犬所以罕音王渙

已來政風曠絕稱職之美復存於公朝以為
能去除洛陽縣令無何丁太夫至憂服勤過
禮執喪惟病因極之心應於木石天降大感
光覆不追春秋六十九儀鳳三季十一月十
七^②終於萬年縣之來庭里第嗚呼哀哉粵
以大周久視元季龍集庚子六月戊寅朔七
^②甲申遷窆於洛陽北邙山之平樂原禮也
惟公履仁居德韞風懷雅宏達不器包容無
方牆隩之深則幽室十扉洞房百牖言行之
重則商湯之駟夏后之璜故能參神明以長

至順^②月以曜物剛以斷金之精也溫潤以
潔玉之符也方弼承帝則運平而機致君唐
虞之上書美荆越之竹豈徒校才班伯願試
定襄之煩比義野王求領長安之劇而信順
而逾毀陽

鳥假道過峻岐而不息崩孺慕於霜露歸精
靈於^缺一辰昔鄭相云亡捨玦悲於東里羊
公既歿罷市慟於南州瞻古揆今不之遠也
飾終以薄遺令在言時服編書與楸衣而共
下含珠連玉同瓦器而不藏長子朝議大夫

行果州司功參軍諱第二子越州都督府士
曹參軍諱第三子符寶郎諱第四子太子典
設郎諱第五子宋州司功參軍訢等罄節勵
行彥士高其式模積學儲實詞至貴其淵洽
州閭化其邕穆神明通其孝悌思所以揚德
來裔垂文永垂託之不刊以申罔極我聞有
命敢作銘云

遷周從甯為公作伯漢台晉冢邦基政本繼
期生拯時惟我君猶彼靈鳳翰飛紫氛行高
德廣如山如雲曾不助順慙留斯文北山伐
墳塋終古蓼莪長號誰謂荼苦

大周久視元年六月七日建鳳閣舍在
河東薛稷為文并自書丹

右唐洛陽令鄭敞碑薛稷撰并正書碑
稱敞上世皆為顯官而敞之為令綽有
政績惜乎唐史無傳稷撰此碑在武氏
久視元年故碑中之字如地作堊天作
而人作王臣作惠國作囹授作稔正作
岳日作㊦年作率之類皆武氏所製故

當時臣下用之非天子不考文此亦可
見武氏僭竊之罪

唐杳冥君銘

悠悠洛邑眇眇伊壘屢移寒暑頻經歲年丹
壑幾變陵谷俄遷不覩碑碣空悼風烟其時
代攸徙寧窮姓氏匪辯缺二誰分朱紫翠墳
全缺玄局亦毀久歇火風爰歸壘水其靈跡
難訪莫知其狀彷彿空臺依稀泉帳草積丘
壠松高巖嶂乃眷幽途彌增悲愴其于彼兆
域是生荆棘松劍猶存榆錢可識覽物流缺

字大息欲致禮於營魂聊寄言於翰墨

大唐神功元年丁酉歲十月一日鳳閣
舍人河東薛稷為文并書丹

右唐杳冥君銘鳳閣舍人薛稷撰并正
書此銘集古錄不載歐陽公蓋未之見
趙氏金石錄雖列其目而云無書誤人
姓名則亦不知其為稷也

銘文但云悠悠洛邑眇眇伊壘又云靈
跡難訪莫知其狀則稷未嘗真知墓地
蓋汎然而銘之其後讀陳子昂集見其

冥冥君墳記云皇帝因登緱山望少室
尋古靈迹得王子晉之遺墟在永水之
層曲欲開石室營壽宮庀徒方興得古
藏焉內有甕瓦長二丈二尺闊八尺中
有古劍一銅椀一瓦器二又有古五銖
錢朱漆片及棖撥之應手灰滅即具物
備容還定舊壙哀其銘志磨滅姓位不
顯乃錫之名曰冥冥君云觀子昂文則
墳嘗發於武氏拚而錫之以名亦武氏
也夫以殘酷不仁之人而能為此比固

死者之幸但稷曰杳冥此曰冥冥蓋杳
冥冥實無二義也

唐尚書省郎官石記序

朝散大夫行右司員外郎陳九言
撰吳郡張旭書

上天垂象北極著於文昌先王建邦南宮
列為會府六官既辯四方是則大總其綱小
持其要禮樂刑政於是乎達而王道備矣聖
上至德光被睿謀廣運提大象以祐生人躬
無為以風天下三台淳曜百辟承寧動必有

成舉無遺榮年和俗厚千載一時而猶搜擇
茂異網羅俊逸野罄蘭芳林殫松秀盡在於
周行矣夫尚書郎廿四司凡六十一人上應
星緯中比神仙咸擅國華以成臺妙修詞制
天一之議伏奏為朝廷之容信杞梓之藪澤
衣冠之領袖頃朝榮初拜或省美中遷昇降
年名各書廳壁訛誤多矣總載闕如非所以
傳故實示不朽者矣今諸公六聯同事三署
並時排金門麟華轂鸞踏鳳跂肩隨武接而
不因僉謀補其闕典於義也無乃太簡乎左

司郎中楊公慎餘於是合清論創新規徵追
琢之良工伐荆藍之美石刊刻為記建於都
省之南榮斷自開元廿九年咸列名于次且
往者不可及來者不可遺非貴自我蓋取隨
時班位以序昭其度也豐約從宜昭其儉也
俾夫金石長固英華靡絕不編班固之年自
然成表未讀馬卿之賦已辯同時不其偉歟
開元廿九年歲次辛巳十月戊寅朔二
日己卯建

右唐尚書省郎官石記序右司員外郎

陳九言譔張長史正書歐陽公謂長史以草書知名此字真楷可愛曾南豐謂其精勁嚴重出於自然如動容周旋中禮非強為者元王文定公謂張公得草聖不傳之妙其真書在唐乃復精絕顏魯公書學氣侔造化楷法蓋得之於公又謂其字體似出歐虞自成一家宋龔明之中吳紀聞云長史蘇人承平時碑在蘇學中堂之後已漸剝兵火後不復存矣元商德符云石刻舊在京兆今亡觀明之及商氏之說則此刻在宋元固已艱得予家所藏本未知其出於蘇學或出京兆皆不可知但歷年久遠而紙墨完好誠希世物也

金薤琳琅卷第九

金薤琳琅卷第十

太僕少卿吳郡都穆

唐臧尚書碑

唐玄靖李先生碑

唐故右武衛將軍贈工部尚書上柱

國上蔡縣開國侯臧公神道碑銘序并

金紫光祿大夫行撫州刺史上柱

國魯郡開國公顏真卿撰并書

翰林待詔光祿卿李秀巖篆額

公諱懷恪字貞節東莞人其先出于魯孝公

之子彊字子臧大夫不得祖諸侯其孫以王
父字為氏僖哀二伯既納忠於魯鼎文武兩
仲亦不朽於言哲丈人成功而遁迹子原抗
節而捨生義和辭金飾之器榮緒奮陽秋之
筆賢達繼軌紛紛至今曾祖滿隋驃騎將軍
祖君皇通議大夫靈州督府長史父善德朝
散大夫贈銀州刺史咸務遠圖克開厥後恤
胤之慶世祀宜哉公即銀州之第三子也身
長六尺一寸眉目雄朗鬚髯灑秀雅善騎射
尤工尺牘沉靜少言寬仁得衆竒謀冲邈英

勇冠倫友于弟兄謹爾鄉黨每敦詩而執禮
不茹柔以吐剛莅事而剖判泉流臨戎而智
略鋒起古所謂文武不墜高明有融者焉少
以勲勞亟紆戎級開元初嘗遊平盧屬奚室
韋大下公挺身與戰所向摧靡繇是發名立
宗聞而嘉之拜勝州都督府長史銳精佐理
繫矩當官朔漠不空邊隅用又俄拜左衛率
府左郎將轉右領軍中郎將兼安北都護中
受降城使朔方五城都知兵馬使戎事齊足
十萬維群我伐用張軍威以肅由是深為節

度使王峻所器奏充都知兵馬使嘗以百五十騎遇突厥斬啜八部落十萬餘衆於狼頭山殺其數百人引身據高環馬禦外虜矢如雨公徒且殲遽而給之曰我為臧懷恪勅令和汝何得與我拒戰乎時僕固懷恩父設支適在其中獨遮護之諸部落持疑不肯公封羊以盟之仗義以責之衆皆感激由此獲免遂與設支部落二千帳來歸後充河西軍前將盤禾安氏有馬千駟富不度一族三人立皆毆斃軍州悚慄疇敢不祇為節度相

國蕭嵩所賞後充河源軍使兼隴右節度副大使關西兵馬使拜右武衛將軍吐蕃不敢東向者累年俄封上蔡縣開國侯開元十二年歲次甲子春二月二十有六日薨于鄴城之官舍享年五十六其年八月二十三日詔曰故具官某頃以幹能亟承任使操行逾謹勞効未酬不幸遷殂良增追悼可贈右領軍衛大將軍即以其年冬十月庚戌遷窆于京兆府三原縣北原禮也嗚呼公兄左羽林軍大將軍平盧副持節懷亮以方虎之材膺爪

牙之任孔懷斯切致美則深七子游擊將軍
崇仁府折衝希崇豐州別駕贈宋州刺史希昶
左武衛將軍朔方節度副使贈太子賓客希
忱右衛左郎將劔南討擊副使贈汝州刺史
希惜右驍衛郎將靜邊軍使贈祕書監希景
寧州刺史左金吾衛將軍贈揚州大都督希
晏開府儀同三司行太子詹事兼御史大夫
邠寧山南觀察使集賢待制工部尚書渭北
節度使魯國公希讓等夙漸詩禮恭承教義
芬潤挺蘭玉之姿英威轡虢瀾之質而希讓

識度弘遠器謀沉邃仁親以孝殿國以忠綽
裕冠於人倫勲勞懋於王室至德中今上為
元帥東伐肇允押牙從收兩京陟降左右入
侍帷幄既崇翼戴之功出擁麾幢載叶澄清
之寄加以篤睦群從糾綏宗族吉凶瞻恤終
始無渝行道之人孰不嗟尚肅宗以公有謀
翼之勤乾元三年春三月贈魏州刺史寶應
元年冬十月又贈太常卿廣德元年冬十月
詔曰孝以立身可揚名於後代忠能事主故
追榮而及親開府儀同三司兼御史大夫元

帥都虞侯魯國公臧希讓亡父贈太常卿懷
恪業茂勲賢地華簪紱佩忠信而行已包禮
樂以資身守節安卑幽貞自處養蒙全正聲
利不營雖與善無徵促靈悲於逝晷而積善
垂祐餘慶光於後昆故得業濟艱難功參締
構 出有藩條之寄入多爪牙之任位以德
遷禮宜加等父由子貴贈合超倫宜登八座
之榮式慰九原之路又贈工部尚書褒異之
典於斯為盛臧氏自驃騎而下世以材雄朔
陸尚書既還持以功懋當代兄弟子姪勲賢

間出自天寶距開元乘朱輪而拖珪組者數百
人迨于今茲繁衍彌熾縮軍州而握兵要者
相望國都有後之慶固殊異於他族者矣真
卿早歲與公兄子謙為田蘇之游敦伯仲之
契晚從大夫之後每接嘗寮之歡故公之世
家竊備見聞敢述遺烈將無媿辭銘曰

魯史褒者臧孫有之陳魚則諫納鼎以規歿
貴言立時稱聖為仁昭典墳智叶著龜世濟

忠肅字缺光羽儀以至夫公英明雄毅鸚視騰

彩龍驤作氣鋒淬霜稜妙窮金匱謀猷泉寫

翰墨風駛儒勇是兼勲庸以位介馳戎馬猛
奮虓虎絕漠援孤連兵戰苦萬虜鳴鏑紛紛
如雨一身抗詞諤諤連柱精貫霜日氣雄鉦
鼓狄人義激僕固誠全眇漫窮裔隨降幾千
野靜沙雪風恬塞煙我騎如雲我旗連天牧
無南向凱有北全天子休之命侯開國謂福
而壽康衢騁力奚命之遭幽局是即十城玉
折萬里鵬息陣雲蒼蒼日暮無色令人趨奉
天眷孔明九原不作八座哀榮勇烈徽範芳
時懿名里成冠蓋族茂簪纓萬古千祀瞻言

涕零

右唐臧尚書墓碑顏魯公撰并正書尚
書墓在陝西之三原縣顏公此刻人間
少傳予向以使事道陝得之尚書七子
希崇希旭希忱希惜希景希晏希讓皆
為顯官而希讓至魯國公顏公文集復
有臧氏糾宗碑書七子官爵與此不同
唐茅山玄靜先生廣陵李君碑銘并
金紫光祿大夫行湖州刺史上柱
國魯郡開國公顏真卿撰并書

先生姓李氏諱含光廣陵江都人本姓弘以
孝敬皇帝廟諱改焉二十一代祖宏江夏太
守避王莽徙居晉陵遂為郡人高祖文嶷陳
桂陽王國侍郎曾祖榮皇朝雷州司馬祖師
龕隱居以求其志徙于江都父孝感博學好
古雅修彭聃之道與天台司馬鍊師子微為
方外之交尤以篤慎著于州里考行議謚
曰正隱先生母琅邪王氏賢明有德行先生
孩提則有殊異晬日獨取孝經如捧讀焉羈
州好靜處誦習墳典年十八志求道妙遂師

率同邑李先生遊藝數年神龍初以清行度
為道士居龍興觀尤精老莊周易之深趣執
喪過哀口不嘗甘旨之味食惟穰麥而已封
植膳羞皆經其手號毀骨立親族莫不傷之
開元十七年從司馬鍊師於王屋山傳授大
法靈文金記一覽無遺綜核古今該明奧旨
玄宗知先生偏得子微之道乃詔先生居王
屋山陽臺觀以繼之歲餘請居茅山纂脩經
法頻徵皆謝病不出天寶四載冬乃命中官
齋璽書徵之既至延入禁中每欲諮稟必先

齋沐他日請傳道法先生辭以足疾不任科儀者數焉玄宗知不可而止先生嘗以茅山靈跡剪焉將墜真經秘錄亦多散落請歸修葺乃特詔於楊許舊居紫陽以宅之仍賜絹二百疋法衣兩副香爐一具御製詩及序以餞之又禁於山側採捕漁獵食葷血者不得輒入公私祈禱咸絕牲牢先生以六載秋到山是歲詔書三至渥澤頻繁輝映崖谷初山中有上清真人許長史楊君陶隱居自寫經法歷代傳寶時遭喪亂散逸無遺先生奉詔

搜求悉備其跡而進上之先時玄宗將求大法請先生為師先生竟執謙冲辭疾而退天寶七載春玄宗又欲受三洞真經以其年春之三月中官齋醮書云其月十八日尅授經誥是日於大同殿潔修其事遂遙請先生為玄師并賜衣一襲以申師資之禮因以玄靖為先生之嘉號焉仍詔刻石於華陽洞宮以志之是歲夏五月隱居先生合丹之所存芝草八十一莖散生於松石之間詔俾先生於中官啓告靈仙緘封表進夏又詔以紫陽觀側

近二百戶太平崇元兩觀各一百戶並蠲其
官徭以供香火秋七月又徵先生既至請居
道觀以養疾九載春辭歸舊山其年夏六月
前生靈芝之所又產三百餘莖煌煌秀異人
所莫覩先生又圖而奏之是歲冬又徵先生
於紫庭別院館之十載秋先生又懇詞告老
御製序詩以餞之十有一載先生奉詔與門
人韋景昭等於紫陽之東鬱岡山別建齋院
立心誠肅是夜仙壇林間遍生甘露因以上
聞特詔嘉異初隱居先生以三洞真法傳昇

玄先生昇玄付體玄先生體玄付正一先生
正一付先生自先生距於隱居凡五葉矣皆
總習妙門大正真法所以茅山為天下道學
之所宗矣於戲是非可齊也物我均焉生死
可忘也覺夢同焉如此者何域心於變化之
際哉先生以大曆己酉歲冬十一月十有四
日遯化於茅山紫陽之別院春秋八十有七
其年十二月八日門人赴喪而至者凡數千
人號奉冠舄遷窆于雷平山之西陲遺命以
松棺竹杖木几水瓶香奩香爐置於藏內門

弟子等仰奉嘉猷克遵儉德先生識思真淳業行高古道窮情性之本學冠天人之際所以優游句曲鬱為王者之師出入明庭特寵肩輿之貴是知順風而問昔稱於黃帝望山而請今見於玄宗矣又博覽群言長於著撰嘗以本草之書精明藥物事關性命難用因循著音義兩卷又以老莊周易為潔淨之書著學記義略各三篇內學記二篇以續仙家之遺事皆名實無違詞旨該博初先生幼年頗工篆籀而隸書尤妙客或賞之云賢於其

父因投筆不書玄宗詔山人王收強請先生楷書上經一十三紙以補楊許之闕先生能於陰陽數術之道而不以藝業為能極於轉煉服食之事而不以壽養為極但冥懷素朴妙味玄津非夫博大之至人孰能盡於此真卿乾元二年以昇州刺史充浙江西節度欽承至德結慕玄微遂專使致書於茅山以抒誠懇先生特令韋鍊師景昭復書於真卿恩眷綢繆足勵超然之志然宗師可仰望紫府而非遙王事不遑寄白雲而攸遠洎大曆六

年真卿罷刺臨川旋舟建鄴將宅心小嶺長
庇高蹤而轉刺吳興事乖夙願徘徊郡邑空
懷尊道之心瞻望林巒永負借山之記而景
昭洎郭闕等以先生茂烈芳猷願銘金石乃
邀道士劉明素求託斯文真卿與先生門人
中林子殷淑遺名子韋渠牟嘗接采真之遊
緒聞含一之德敢強名於卷黨曷足辯於鴻
蒙其詞曰

抱一混茫人之紀綱先生以之氣王神強乃
啓玄旨玄門以彰乃為帝師帝道惟康甘露
呈瑞靈芝効祥上士云感高風再揚鶴返仙
廟雲辭帝鄉退歸而老妙識行藏德本無累
道心有常寔曰形解孰云坐忘伐石表墓勒
銘傳芳谷變陵遷厥跡彌光

大曆十二年夏五月建渤海吳崇休鑄
右唐玄靖李先生碑顏魯公撰并正書
碑稱隱居先生以三洞真法傳升玄先
生升玄付體玄先生體玄付正一先生
正一付先生自先生距隱居凡五葉矣
今考之隱居先生者梁陶弘景升玄為

王遠知體玄為潘師正正一為司馬子
微三人唐書有傳惟玄靖無之予嘗遊
茅山至玉晨觀其前有雷平池池南為
伏龍岡玄靖葬其上碑今在觀中四周
皆刻文字道士以亭覆之

金薤琳琅卷第十

